



ル 5
3150
3



門 儿 5
3150
卷 3

黔南識略卷三

貴州巡撫長白愛必達撰

開州

開州在府治東北一百二十里元置雍真乖西葛蠻等處蠻夷軍民長官司明崇禎四年以宣慰宋氏洪邊十二馬頭地置州設總兵官一員江防道一員駐其地以江外猶安氏所據也尋裁

國朝因之設知州一學正一訓導一吏目一其境東至平越直隸州界六十里西至修文縣界五十里南至貴筑縣界五十里北至遵義府遵義縣界六十里東

南至平越直隸州界九十里西南至貴筑縣界四十里東北至平越直隸州湄潭縣界七十里西北至修文縣界四十里邊舊播之橫衝爲會垣之後禦州治舊爲狃苗巢穴明季因其地建城城周四里二分高二丈二尺登以石居城之中爲鰲山在州署後狀如鰲對峙者爲三臺山在城西州之屏蔽也其左爲祖師山上有祖師觀又名北極觀下有葡萄泉深不可測舊志明崇禎十年有龍自泉出觀中盤柱木龍與之鬪雷雨俱作卽此陰陽山在城西南土人以雲氣占晴雨故名魯郎山在乖西司本名乖西山又名書

案山旁有洗馬潭三昧巖在城北五十里白石阮在城南四十里昔產硃砂仙人洞在城南三十里山甚高峻洞居山半石液凝成人物各像左有聯珠塘清鑑毛髮右有天生橋橫臨洞上白馬洞在城南三十里有河自山流出爲洗泥河之上源滙諸澗水迤而東爲洗泥河又東逕州之廉里會貴定流來之清水江由天星橋八吊口棉花渡東入於巖門注烏江巖門在州東界外州轄十里曰孝里弟里忠里信里禮里義里廉里恥里思里清里近河之田皆膏腴不虞水旱現在成熟田二萬五千四百二十三畝有奇

徵米二千一百二十三石有奇徵銀一千一十兩有奇徵雜稅銀七十四兩有奇常平倉貯穀二萬七千五百餘石戶口漢莊九百有奇苗寨三百有奇學額八名城申駐把總一員兵四十一名塘汛九場市有本城大羊中壩哨上馬場狗場猴場馮公南貢永興米坪白馬洞白楊林用沙壩宅吉毛栗舖中伙爐凡十有七處署右開陽書院雍正間知州馮詠建黃公祠在城北北極觀右祀明知州黃嘉雋考舊記明崇禎末開州狃苗叛直逼貴陽知州黃嘉雋擐城固守援兵不至城破力戰而死州民以嘉雋素有惠政瘞

於城北並立祠致祭焉土司二乖西正長官司本宣撫司明洪武五年土酋楊文真歸附改置長官司乖西副長官司明洪武四年授土人劉海為副長官今並承襲州地樹多青桐可飼蠶俗織嗇知治生雖極貧皆知儲升斗為卒歲計其自馬蹄關至用沙壩之洋水熱水土著居民則皆依砂廠為資生黔書曰洋熱之砂為箭鏃為箇子用壩之砂為斧劈為鏡面采砂者必驗其影尾之掘地而下曰井平行而入曰塋直而高者曰天平墜而斜者曰牛汲水皆支木冪板以為廂焚膏而入蛇行匍匐夜以繼旦遇石則斧之

過堅則煤之達而後止龐而重者爲砂寶伏土中响
响作伏雌聲聞者勿得驚驚則他走凡砂之走響如
松風無巨細以晶瑩爲上柳子所謂色如芙蓉是也
負荷而出投諸水淘汰之搖以牀漂以箕漉以囊不
卽乾口以吹之其水入之池或引之竿越岡踰嶺
涓涓天上落也水銀竈有大小釜亦如之大者容砂
二十升離而爲十層次入之間以糲糝布陳汞灰於
其上治以杓中凹而圍凸覆以釜差殺之揉鹽泥而
塗其唇築之乃煨之凡一晝夜而汞成俟其性定挹
而注諸豕脬裏而縛之乃可行遠已成汞而升之復

可爲硃江右之民麇聚而收其利今砂廠歸貴筑縣
抽稅其一切彈壓稽查州爲經理苗有花苗狃苗紫
薑苗花苗紫薑苗性久馴稼穡之外惟務漁獵狃苗
婚喪漸習漢儀每歲九月開徵諸苗較漢民先一日
納賦旣納乃聚其族人剖豕傾釀而以官所賞之花
紅祭其祖旌於門楣以爲慶幸其急公奉上之心亦
不與時雍之一驗也餘與各屬同

定番州

定番州在府治西南一百里宋羈縻南寧州地有龍
番方番張番石番羅番號五姓番程氏韋氏比附五

姓號西南七番皆奉職貢授爵命元至元十六年招降西南諸番小龍番臥龍番大龍番程洪番方番石番盧番俱置安撫使謂之八番明成化十二年置程番府隆慶二年移府治于省城萬歷十四年于舊府治置州屬貴陽府

國朝因之設知州一州判二分駐大塘羅斛學正一訓導一吏目一其境東至廣順州屬大壩場界三十五里西至羅斛州判屬木星塘界九十里南至大塘州判屬擺榜塘界八十里北至廣順州屬乾橋塘界二十里東南至龍里縣屬夾幌塘界九十里西南至大

塘州判屬牛角塘界一百五十里東北至廣順州屬長田塘界三十五里西北至廣順州屬威遠汎界四十五里廣一百五十里袤一百六十里北屏省會南接粵西控扼蠻夷實爲要地城周三里七分甃以石門三惟北門不通啟閉琴山在城東一里形如琴故名麒麟山在城東五里屏風山在城東上馬橋司南又有卓峰山筆架山在城南五里又有掛榜山三寶山在城南七里三峰卓立州人禱雨輒應連珠山在城南八里五山圓秀連絡如珠相近有笠山俗名斗蓬山九龍山在城北十五里九嶺起伏蜿蜒如龍後

起一峰遙望如畫三台山在城南金石司南又有天堂山伏龍山天生洞蒙山在程番司西天馬山在城西南木瓜司西旁有蓮花洞相近有獨鯉山鳳凰山翠松山在城西南大華司前又司北二里有播答山司南十里有牛角山百蓮山在城西南麻嚮司北二里又有盤龍山沿臺山在城西南木瓜司西三里又寨北五里有木栗山交椅山在城西五里又西一里有旗山三疊山在城西洪番司南又司北有伏蛟山印山在城西韋番司執笏山在城西大龍番司南月坡山在城西臥龍司南三里又南十里有文峰山錦

屏山在城西北方番司北又有將臺旗峰二山驪龍玩珠山在城北二里以山勢盤曲向城也盧山在城西盧山司南山極高峻有三石峽如門頂平廣容千人
人有泉有池田土可耕蓋鄉人避兵處也又南有茶山產茶又司南三里有五門山又司西五里有寶塔山司北有沙帽山俱以形似名象山在盧番司前又有獅子山牛眠嶺在城南小龍番司南旁有文秀峰翁松嶺在盧番司前又司北有松明嶺獨峰在克度里營盤坡在城南二里紅土坡在城西一里又有楊梅坡產楊梅伏龍坡在小程番司南二里西通上馬

黔南諸州卷三
橋東達盧番河滴水巖在城東南十里泉水四時不絕行人資以濟渴前有平地名三墓賊嘗出沒于此向置哨戍守長巖洞在盧番司南十五里嘉木箐在小程番司南十五里又司南五十里有江渡箐仙人洞在臥龍司東十里又東南十里有白象洞洞中有石如象天生洞在金石司東十里龍王洞在盧番司西五里濛江一曰洪水江亦名都泥江俗名烏泥河源出州西北二十里亂山中曰濛潭其注于濛江者則有州北二里之玉帶河又州西二十里之九曲江盧番司東之洗馬河羅番司南之環帶江合金石司

之回龍江羅番司之羅番河臥龍司南之繞翠江洪番司南之小溪水又奔龍江自大龍司合大龍河東流注之又東南有底方河自方番司南合小番河雲溪水並注之又東南有冷水河從小程番司南合連江東流注之又東南有腰帶河自盧山司南合擺遊河東流注之歷廣西泗城慶遠思恩柳州諸府界流入潯州府武宣縣合潯江顧祖禹方輿紀要以爲牂柯江洪亮吉貴州水道考以爲卽班志牂柯郡毋斂縣之剛水未免臆斷矣上馬橋河在西北二十里下流入于南明河清水塘在城南灌田數百畝又乾堰

在程番北水盈縮可驗豐歉州轄土司十四土千總
二土舍五上馬橋長官司在城西北二十里元置上
橋縣屬定遠府明洪武五年方朝俸歸附改置臥龍
番長官司在城南十五里宋置南寧州治此至道
年有南寧會長龍漢瑋入貢自號龍番元豐二年復
入貢元置臥龍番南寧州安撫司明洪武五年龍德
壽歸附改置小龍番長官司在城東南二十里元置
小龍番靜蠻軍安撫司明洪武五年龍泉歸附改置
方番長官司在城南七里元置方番河中府安撫司
明洪武五年方得用歸附改置盧番長官司在城北

五里元置盧番靖海軍安撫司尋析其西北境置盧
番蠻夷軍民長官司明洪武五年盧朝俸歸附改置
金石番長官司在城東二十里宋元豐二年石番來
貢卽此元置金石番太平軍安撫司明洪武五年石
愛歸附改置木瓜長官司在城西南八十五里元置
木瓜等處蠻夷軍民長官司明洪武五年改置以上
七司由部承襲有印程番長官司本附郭今在城南
十里本元程番武勝軍安撫司明洪武五年改長官
司授程谷祥韋番長官司在城南十里元置韋蠻番
長官司明洪武五年授韋四海爲長官司羅番長官

司在城南三十里宋元豐二年羅番入貢卽此元時
置羅番邊蠻安撫司明洪武五年龍世映歸附改置
大龍番長官司元置大龍番安撫司明洪武五年改
置小程番司在城西北十里元置小程番蠻夷軍民
蠻夷長官司明洪武四年程授孫歸附置木瓜副長
官司在城西南八十里始于元時顧德明明洪武五
年置今司麻嚮長官司在城西南九十里明洪武七
年得玉思以功置今司以上七土司由部承襲無印
洪番司上馬副司今爲二土千總由總督咨部承襲
盧山司牛路司大華正副二司木官里司今爲五土

舍由總督給委漢莊一千一百一十有奇苗寨二千
一百九十有奇苗戶五倍于漢民城中駐劄定廣協
副將一員左右兩營都司一員守備一員千總三員
把總四員外委六員兵九百一十名分防斷杉樹
把總一員兵七十名明通關把總一員兵五十名方
番司汎把總一員兵三十五名右營守備別帶分防
兵駐大塘城無驛遞學額文武各十二名中峰書院
在學署右義學在東關舊有萬人墳爲明按察司張
耀等拒賊守城城破被屠後人火瘞之表曰忠烈嘉
慶丙子學政張翰據通志奏請建坊致祭題曰萬人

義塚坊城外舊有橋曰迎恩上有烈女墳賊屠城時
有烈女至橋罵賊不屈觸橋死血漬橋石成人形羣
蟻負土以揜高尺許後人表以石碣道光丙戌州牧
建橋亭五楹翼其塚田畝近城及羨塘樂號等處爲
膏腴餘亦多磽瘠農勤耕作產米故饒額徵秋糧米
一百四十三石八斗八升銀二千五百四十八兩六
錢八釐莊租學租銀七十五兩五錢九分牙帖銀五
兩當帖銀六兩土司所屬苗寨由土司零徵彙解秋
糧正米支放兵糧廩餼餘米耗米變價批解常平倉
穀一萬四千六百四十八石九斗二升有奇不敷兵

糧赴道庫領銀採買折徵官莊米五十五石一斗七
升一合支放孤貧及歲暮賑濟寒生餘米亦變價批
解場市有東關三都斷杉樹廖家坡臥龍甲戎河口
場廬山養牛卡代花木瓜擺金甲浪岡渡羨塘上馬
雅水翁巴小龍等處按十二支爲期地接廣西以紅
水江爲界近日木拔道通小徑叢雜由所屬之赤土
經白楊箐可通廣順之燕樓及清鎮之梅子冲由上
馬司經青巖可通廣順之黨武由沙子哨經威遠改
密可通安平之破籠由大塘之明通汎可通龍里貴
定之平伐岡渡由羅斛之桑郎八達可通貞豐歸化

之王母者香他如廬山之革犯關金石之木星菁木
瓜正副之擺照河程番司之甲浪木官里之鼠場河
臥龍司之雅水小龍司之播翁方番司之擺金場大
華正副之代花場羅番司之堵照大龍司之三都小
程司之蒙連河地皆僻遠稽查尤宜周也地產五倍
子天麻紫草白紙黃菓梨橘之屬棉花則羅解附近
處皆有之俗稱爲花山苗民在唐家里廬山司大華
司者性稍頑尙知畏法青苗最馴勤紡績白苗輕生
尙報復勤于輸將狝家最悍多鼠竊狺獷居萬山之
中荆壁而塗

男子計口

而耕婦人度身而織暇則漁獵爲業婚喪以犬相遺
俗類狝家擺榜苗短衣露腹性頗淳樸補農苗冠婚
俱用牛喪祭砍牛名曰替厲又有谷蘭苗婦人工紡
織其布最精密名谷蘭布男子剽悍出入持槍弩又
有八番苗服飾與漢人同其俗女勞男逸朝耕暮織
當炊始春以寅午日爲市燕會擊長腰鼓爲樂葬不
擇日夜靜出之謂恐其親知之也

大塘州判

大塘州判定番州屬在府治東南二百餘里舊爲大
龍司地

國朝乾隆三年總督張廣泗剿平姑盧寨苗阿沙等之亂築城于大塘設州判分駐其境東至本州界三十里西至羅斛州判界一百三十里南至都勻府界七十里北至本府界三十里城周一里三分登以石門四乾隆五年建上下均無驛遞渡口由大塘至省爲大道其小徑則由斗城歷平寨出藤茶河可通都勻之牙州由高寨歷擺別可通羅斛由火寨歷西涼可通都勻亦通廣西屬之南丹州由虎狼塘歷堵疊甲浪可通定番由掌芒寨歷雅水可通三都其水有隴黃擺鋪洞得諸山及甲港山麓之水俱流入于甕

城河又藤茶山下有藤茶河亦東北流入于甕城丹平丹行二土舍元明時皆長官司今改並有副舍亦經裁汰二舍之外有五里曰通州曰降隆曰上中下克度二舍專係催徵錢糧並無管轄地方田畝則丹行丹平通州三處田頗膏腴餘則忌澇多石田不可耕現在成熟田八千一百二十畝有奇額徵秋糧備支米一百八十一石六斗二升有奇徵銀五百一十五兩四錢九分有奇常平倉實貯穀七千九百七十八石兵糧除備支外餘赴糧道衙門請領採買義學一駐城定廣協右營守備一員把總一員兵丁二百

十名塘汎十場市六城鄉漢苗錯處所屬漢莊苗寨共二百四十三寨境內山高嶺峻地瘠土磽蠶桑非所宜而婦女勤于紡織民苗力穡之外兼以工商自給足資食用無銅鉛礦廠亦無稅課苗有黑狎白狎花苗始盧擺榜麻蔣油把擺稿諸名色分寨而居並係熟苗經化導日漸馴良餘與州同

羅斛州判

羅斛州判定番州屬在府治西南三百里舊爲土司地屬廣西泗城府

國朝雍正五年改土歸流撥隸黔省貞豐州至乾隆十

五年改歸定番州其境東至廣西南丹土州界一百一十里西至貞豐州界二百里南至廣西泗城府凌雲縣界一百三十里北至定番州界一百一十里東南至凌雲縣鴉里塘界一百九十里西南至貞豐州渡邑亭界一百八十里東北至都勻府平州司賚栽寨界七十里西北至歸化廳屬打林寨界一百二十里城周二里五分築土爲墉下甃以石設東北二門乾隆九年建地處僻鄉商賈不至土著多黃王二姓散處六十一亭以耕織爲生境內險隘以木星箐桑郎聖紅聖坡球四處爲最要餘皆高峰插漢夾箐陰

森前爲泗城南丹之門戶後爲獨山都勻定番之咽喉水則打來河源出巴連洞東南流至溝亭有巴歪渡爲境內要津水勢深迅設有渡船猛雨則不能渡又打如河源出雙井亦名雙井河自羅方亭而下東南流合打來河入紅水江洪亮吉水道考以克度索獐河入博獐河博獐河入溫則南盤江也地近粵西天氣鬱燠嵐瘴未消田無頃畝可計亦無料則可分羅惴床井溝亭逢亭上隆羅蘇賴石各亭雖非膏壤水旱皆可收毋運羅畫安沙何往泗亭羅賴各亭礮瘠而畏旱額徵正米七百一十六石有奇徵銀三

千一百一十二兩有奇常平倉實貯穀一萬一千一百三十九石二斗九升有奇又溢額穀八十二石兵糧於秋米內支給本處山多田少產米無幾因道險僻無出境者故民食可敷駐城分防千總一員外委一員兵丁九十餘名場市一以戍爲期各亭皆有小集遠者百餘里並責亭目約束民遷徙不常有寸土可墾者皆藝雜糧棉花無隙地牙課銀三兩苗惟狎家一種有生熟之分生苗風俗與漢人殊無土司皆亭目管理兼設把事見流官與齊民等通屬熟苗二百五十三寨計一萬六千一百三十一名口向化生

苗一百一十寨計六千七百七名口四至皆僻徑設有一汎十四塘

廣順州

廣順州在府治西南一百一十里元置金竹府古坭縣明洪武四年改置金竹長官司隸四川行省十四年升爲安撫司十九年改屬廣西二十七年仍屬四川二十九年隸貴州軍民指揮使司正統三年置隸貴州布政司成化十二年屬程番府隆慶二年改屬貴陽府萬曆四十年改金筑安撫司爲廣順州

國朝因之設知州一學正一訓導一吏目一其境東至

貴定縣界猛姑擺地寨一百八十里西至安順府界高寨塘二十里南至定番州界沙子哨五十里北至安順府安平縣界破龍場二十里東南至定番州盧山司界六十里西南至安順府界納冗大坡寨二十里又至歸化屬夾坡哨界三十里東北至貴筑縣界川心堡五十里西北至安順府鎮甯州界馬路場十二里重岡疊阜山廣箐深居諸夷叢集之中所屬翁桂白崖乾溝文馬燕溪各關及羅榮一砦則昔人所倚以據守者也舊無城垣東西南三面柵木爲門環以民居崇山倚其北在州署後者曰天馬山奇秀卓

崙甲於諸山古樹修藤虬蟠雲結懸厓峭拔允饒奇
草螺擁山在州東二十里上有深潭白雲山在州東
四十里層巒疊嶂如渴驥奔泉至此而止山頂白雲
陰晴皆見俗傳明惠帝遜迹之所上有羅永菴古杉
二株長數丈其一經帝手摩故至顛絕無附枝又有
跪井舊無水龍神爲之湧波恒雨不溢恒暘不涸取
水者必跪汲云又有流米洞天臺山在州南五里昔
傳有黑白二鹿往來其上雲臺山在西南二十里麓
石坡在州北十里九曲河在州南縈繞如帶一宿河
在從仁里明惠帝曾宿此故至今無蚊尤愛溪在從

仁里水出山腹中東折復入山腹瀉爲瀑布注於濟
番河龍潭在阿沙壩南明河之所出也合濟番河會
一宿河尤愛溪諸水入府境下流注烏江麻線河在
州北十里下流入都泥江天生橋在從仁里石壁千
仞還繞如城水流其下人行其上平坦如橋橋下石
如蜂房蟹匡厯厯可數聖水在城西一里人汲則湧
不汲則伏古垣廢縣在州南百里俗名其地曰古羊
明初廢金筑長官司在州西一里明洪武四年以元
安撫司密定歸順置長官司治斗笠寨十六年遷治
杏林峯永樂十一年又遷於馬嶺之陽卽壩寨萬厯

四十年金筑安撫土舍金大章乞改土歸流授大章
土知州今裁田畝近州治者水旱無虞其餘肥瘠相
半現在成熟田三萬二千五百三十畝六分八厘有
奇惟徵條編馬館不徵秋米共徵正銀一千七百七
十二兩六錢有奇常平倉實貯穀一萬四千二百一
十一石二斗三升有奇社穀二百二十一石二斗歸
本州經管學額歲科試皆八名建有廣陽書院在州
城中義學一原設廣順汎千總一員外委一員制兵
五十名兵糧赴長寨營支領嘉慶六年四寨青苗滋
事巡撫奏准添撥都勻協守備一員外委二員提標

兵一百名威甯鎮標兵五十名道光十二年共裁汰
四名歲支兵糧係撥清鎮縣秋米運供支給以新城
分注千總一員兵四十名宗角汎分防把總一員兵
三十名又州治駐劄長寨營分防外委把總各一員
兵三十名漢莊苗寨編爲十里十枝曰忠順里
太平里維新里來遠里從仁里久安里來格里長治
里歸德里首善里十枝曰松岡枝改雅枝猛昌枝擺
塘枝開弄枝梭把枝歸善枝潮井枝穀增枝雞場枝
里係漢苗錯處共漢莊六十有奇苗寨一百六十有
奇枝盡屬苗寨共計一百一十有奇場市十本城南

北兩場外有黨武青巖大壩改審馬林擺所宗角威
遠八場鋪遞九曰州城牛了營猪槽堡楊柳哨打浪
吳超石板哨濫泥溝鳳凰哨每鋪設鋪夫二名土產
紙木多松柏杉梓楊柳隙地間種桐茶雜糧之外有
玉米仙米境內無銅鉛礦廠亦無稅課苗有六種白
苗花苗青苗與他境無異性勤耕織擺塘苗性類狎
家牯牛苗懸崖而居高者百餘仞構竹梯上下耕不
用牛以鐵鑄代犁發土耨而不耘性淳樸稀見官長
又土人一種與軍民通婚姻歲時禮節無異漢人狎
家苗亦與他屬同

